

Inunnik annertusisamik innarluutilinnut ikiorsiisarneq pillugu FN-ip innarluutillit pisinnaatitaaffii pillugit isumaqatigiissutaanut naapertuunnerusumik Naalakkersuisut iluarsaatamik inatsisilioqqullugit Inatsisartut aalajangiiffigisassaattut siunnersuut, taamaalilluni pisinnaatitaaffiit teknikkigit inatsisinut attuumassutilinnut atuuttussanngorlugit aaqqissuunneqarlutik, allannguut kingusinnerpaamik UPA2017-imi saqqummiunneqassaaq.

(Siumup Inatsisartunut ilaasortaataannit saqqummiunneqartoq)

aamma

Naalagaaffiit Peqatigiit inuit innarluutillit pillugit Isumaqatigiissutaanni pisinnaatitaaffiit siuarsarneqarnissaannut Naalakkersuisut peqquneqarnissaannik Inatsisartuni aalajangiiffigisassatut siunnersuut, tamatumani inatsimmi pineqartunut atuuttumut atuutsinneqalernissaat aammalu suliat ingerlanneqarnerini Naalagaaffiit Peqatigiit inuiat innarluutillit pillugit Isumaqatigiissutaanni Kalaallit Nunaanni atuuttut suliarineqarnerini iliussissatut pilersaarutitut ilanngullugit suliarineqarnissaat.

(Inuit Ataqtigiit Inatsisartunut ilaasortaataannit saqqummiunneqartoq)

pillugit

Ilaqtariinnermut Peqqissutsimullu Ataatsimiititaliap

ISUMALIUTISSIISSUTAA

Siunnersuut aappassaaniigassanngorlugu saqqummiunneqartoq

Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Tillie Martinussen, Demokraatit, siulittaasoq
Inatsisartunut ilaasortaq Agathe Fontain, Inuit Ataqtigiit, siulittaasup tullia
Inatsisartunut ilaasortaq Jess Svane, Siumut,
Inatsisartunut ilaasortaq Laura Tàunâjik, Siumut
Inatsisartunut ilaasortaq Ineqi Kielsen, Siumut
Inatsisartunut ilaasortaq Ane Hansen, Inuit Ataqtigiit
Inatsisartunut ilaasortaq Mimi Karlsen, Inuit Ataqtigiit

UKA 2015-imi ulloq 14. oktober 2015-imi siullermeerinerup kingorna siunnersuut ataatsimiititaliamit sukumiisumik suliarineqarpoq.

Siunnersuutit imarisaa siunertaalu

UKA 2015/27

Inunnut annertuumik innarluutilinnut ikiorsiisarneq pillugu siunnersuummik iluarsisamik aammalu inatsimmik attuumassuteqartumik allamik kingusinnerpaamik UPA 2017-imi Naalackersuisut saqqummiusseqqullugit peqquneqarnissaat Inatsisartunit tapersorsorneqarnissaa siunnersuuteqartup kissaatigaa, taamaaliornikkut FN-p inuit innarluutillit (tulliuttuni Innarluutillit pillugit Isumaqatigiisummik taagorneqartoq) atuuttussanngortinnissaat qulakkeerneqarsinnaaqqullugu.

UKA 2015/41

Innarluutillit pillugit Isumaqatigiisummut pisinnaatitaaffiit inatsimmut attuumassuteqartumut ilanngutsinneqarnissaanut Naalackersuisut sulissuteqaqqullugit peqquneqarnissaannik Inatsisartunit tapersorsorneqarnissaa siunnersuuteqartup kissaatigaa. Matumani Kalaallit Nunaanni Innarluutillit pillugit Isumaqatigiisutip atuuttussanngortinnisaanut iliuusissatut pilersaarummut atatillugu.

Siunnersuutit Inatsisartuni siullermeerneqarnerat

Siunnersuutit ulloq 14. Oktober 2015-imi ataqatigiissillugit siullermeerneqarput.

Ilaqutariinnermut, Naligiissitaanermut Isumaginninnermullu Naalackersuisup Naalackersuisut sinnerlugit akissuteqaataatigut saqqummiussaata saniatigut partiit Siumut, Inuit Ataqatigiit, Demokraatit aamma Partii Naleqqap oqaaseqartartuisa oqaaseqaataat allaganngorlugit saqqummiunneqarput.

Innarluutilinnut inatsisissamut nutaamut siunnersuummik UPA 2017-imi saqqummiussilersaarlutik Naalackersuisut paasisutissiisutigaat. Innarluutilinnut isumassuinerup 2011-imi kommuninut nuunneqarnerani misilittakkat siunnersuutissamut Naalackersuisut ilanngukkumavaat aammalu FN-imi innarluutillit pillugit komitep innersuussutai ilanngunneqassallutik.

Innarluutillit pisinnaatitaaffiisa inatsimmi allami aamma qulakkeerneqarnissaat eqqumaffigineqarmata Naalackersuisut ilisimatitsissutigaat. Matumani assersuutigalugu peqqinnissaqarfiup, ilinniartitaanerup aamma suliffeqarnerup iluani.

Siunnersuutit marluk akuerineqassasut Naalackersuisut innersuussutigaat.

Innarluutillit inuiaqatigiinni peqataanissaat immikkullu pisariatitsiffigisaanni tapersorsorneqartarnissaat Siumup oqaatigaa. Matumani assersuutigalugu ineqarnermut ilinniagaqarnissamullu tunngasuni. Innarluutillit atugaasa pitsanngorsarneqarnissaat partiip anguniagarigaa Siumup ilanngullugu oqaatigaaa. Innarluutilinnut sinaakkutissatut piumasarineqartut inissinneqarsimassapput, aammalu Innarluutillit pillugit Isumaqatigiissummut atatillugu pisinnaatitaaffiit inatsimmut attuumassuteqartumut atortuulersinneqassallutik. Siunnersuutit marluusut Siumup taperserpai, inatsimmi attuumassuteqartumi innarluutillit pisinnaatitaaffiisa atortuulersinneqarnissaat siunertarineqarmat.

Siunnersuutit marluk akuerineqarnissaat Siumup innersuussutigai.

Innarluutillit pillugit Isumaqatigiissutip nunatsinni inatsimmi atortuulersinneqarnissaata qulakkeerneqarnissaanut partiit anginerit suliaqarnissamut isumaqatigiimmata naammagisimaarlugu Inuit Ataqtigiit oqaatigaat.

Innarluutillit pillugit Isumaqatigiissut nangaassutitaqangitsumik nunatsinni atuutilersinneqarnissaa pisussaaffiliisoq Inuit Ataqtigiit erseqqissaatigaat.

Innarluutillit atuarfimmi ilinniagaqarfinnilu pitsaasunik ineriartuutaasumillu periarfissinneqarnissaat aamma qulakkeerneqassasoq Inuit Ataqtigiit Siumut assigalugu pingaartippaat. Aammattaaq innarluutillit piginnaasaat ineriartornerminnilu periarfissaannut naapertuuttumik suliffeqarnissamut periarfissinneqarnissaasa pitsaanerusumik qulakkeerruttariaqarpavut.

Ilinniagaqarfiit ilinniartunut immikkut piginnaanngorsarnissamut siunnerfilimmillu pisariaqartitanik piukkunnarsaanissaq innarluutilinnillu paasinnittumik neqerooruteqarsinnaassasut Inuit Ataqtigiit aamma oqaatigaat.

Siunnersuutit marluk akuerineqarnissaat Inuit Ataqtigiit innersuussutigaat.

Innarluutilinnut sulinerup ingerlaqqinnerani Innarluutillillu pillugit Isumaqatigiissutip siunnersuutissami atortuulersinneqarnissaanut innarluutilinnut ataatsimut isigalugu sapinngisamillu neqeroorutit nukittorsarneqartariaqartut Demokraatit oqaatigaat. Pitsanngorsaanissamut inissaqarlunilu pisariaqartitsisoqarpoq. Innarluutilinnut iluaqutaasumik, suliap pingaarutillip tamatuma kivinnissaanut peqatigiiffiit tapersorsornerisata saniatigut, innarluutillit atugaannik pisinnaatitaaffiinillu suliaqartut ilisimasalik tunioraanissamut piukkunnarsarsinnaapput.

Demokraatit naapertorlugit innarluutillit angerlarsimaffiisa illutaat nutarterneqartariaqaralarput, soorlutaaq innarluutilinnut inunnullu ineriartornermikkut akornutilinnut najugaqarfinni pissutsinik najugaqarfinnillu neqeroorutinik pingaarnersiuisoqartariaqaralarput. Innarluutillit angerlarsimaffiini sulisut pikkorissarneqartariaqarput. Innarluutilinnut innarluutillillu angerlarsimaffiini taamatutaaq sulisunut ileqqorissaarnissamut pisinnaatitaaffinnullu tunngasuni patajaallisaasariaqarput. Inuiaqatigiinni peqatigiiffilerinermilu peqataanissamut, nammineq inuuneqarnissamut, naleqarluni inuunissamut, kinaassuseqarnissamut naleqqussarnissap ataqqineqarnissanut il.il. pisinnaatitaaffiup tapersersorneqarnissaata saniatigut innarluutillit kinguaassiuutaasigut kannguttaatsuliorfigineqarsinnaanerisa immikkut eqqumaffigineqartariaqarnera Demokraatit oqaatigaat.

Innarluutillit ilaqutaasa inatsisissami pitsaanagerusumik tapersersorneqarnissaat Demokraatit aamma oqaatigaat. Matumani assersuutigalugu siunnersuinerusinnaavoq, tarnip pissusaanik ilisimasalimmik ikiorserneqarneq imaluunniit ilaqutariittut peqqissarneqarnikkut. Aammattaaq inuusutut innarluutillit immikkut pilersaarusiukkamik efterskolertalernissaat pillugu UKA 2011/22-imut aalajangiiffigisassatut siunnersuutip akuerineqartup inatsisiliornissami Naalakkersuisunit eqqumaffigineqarnissaa aammalu aalajangiiffigisassatut siunnersuutini allani assingusuni innarluutillit pisinnaatitaaffiisa atugaasalu sammineqarnissaat ilanngullugit Demokraatit oqaaseqartartuata saqqummiussaani oqaatigineqarpoq.

Tamanna tunngavigalugu siunnersuutillu pillugit isumaqatigiittoqarneratigut Ilaqutariinnermut Peqqissutsimullu Ataatsimiititaliami suliarineqartussanngorlugit innersuussutigineqarput.

Ataatsimiititaliap siunnersuutininik suliarinninnera

Siunnersuutit marluusut siullermeerinermi tamakkiisumik akuerisassanngorlugit innersuussutigineqarnerat ataatsimiititaliamit naammagisimaarlugu tusaatissatut tiguneqarpoq.

Innarluutillit pillugit inatsisissatut siunnersuummik nutaamik Naalakkersusut UPA 2017-imut saqqummiussilersaarmata ataatsimiititaliamit ilanngullugu tusaatissatut tiguneqarpoq. FN-p Innarluutillit pillugit komitiata maannamut innersuussutai Naalakkersuisunit ilanngunniarneqarnerisa saniatigut, innarluutilinnut isumassuinerup kommuninut nuunneqarnerini misilittakkat siunnersuummi matumani Naalakkersuisunit ilanngunneqarnissaat tulluarterujussuussaaq.

Inatsimmi allamik suliareqqinneqarnissaa aamma pingaaruteqassasoq Naalakkersuisut assigalugit ataatsimiititaliamit eqqumaffigineqarpoq, taamaaliornikkut Innarluutillit pillugit

Isumaqatigiissut tamakkiisumik atortuulersinnaaqullugu.

FN-p Innarluutillit pillugit Isumaqatigiissutaa Kalaallit Nunaanni nangaassutitaqanngitsumik atuuppoq

FN-p Innarluutillit pillugit Isumaqatigiissutaa Kalaallit Nunaannut Savalimmiunullu nangaassutitaqanngitsumik 2009-mi Danmarkip atuuttussanngortippaa. Suliap ingerlanerani suliaq Danmarkip Kalaallit Nunaannut saqqummiutissallugu sumiginnarsimavaa, taamaattorli tamatuma kingorna 2012-imi tamanna pivoq, UKA 2012-imi Inatsisartut ataatsimiinnermini pisortatigoortumik isumaqatigiissut suliaraat tassanilu aalajangiunneqarluni isumaqatigiissutip nangaassutitaqanngitsumik Kalaallit nunaannut atuutilersinneqarnissaata uppersarsarneqarnissaa.

Innarluutillit pillugit Isumaqatigiissutip nuna tamakkerlugu atuutilersinneqarnera nakkutigineqarneralu.

Innarluutillit pillugit Isumaqatigiissummi Artikel 33-p qanoq Kalaallit Nunaannit malinniarneqarnersoq pillugu Ilaqutariinnermut, Naligiissitaanermut Isumaginninnermullu Naalakkersuisumit 20. Oktober 2015-imi allakkatigut ataatsimiititaliaq ilisimatinneqarpoq, taamaaliornikkut nuna tamakkerlugu Innarluutillit pillugit Isumaqatigiissutip ingerlanneqarnissaa nakkutigineqarnissaalu qulakkeerneqarsinnaaqullugu.

Isumaqatigiissutip piviusunngortinneqarnissaanut atatillugu Ilaqutariinnermut, Naligiissitaanermut Isumaginninnermullu Naalakkersuisoqarfik attaveqaatit ataqatiissarisutullu toqqarneqarpoq.

Inuit Pisinnaatitaaffiit Instituti 2014-imi Kalaallit Nunaanni inuit pisinnaatitaaffii pillugit isumaginnittut toqqarneqarpoq. Kalaallit Nunaanni FN-p Innarluutillit pillugit Isumaqatigiissutaata siuarsarneqarnissaa, illersornissaa ingerlanneqarneratalu nakkutigineqarnissaa pillugu Artikel 33. Imm. 2 naapertorlugu Inuit Pisinnaatitaaffii pillugit Instituti aamma Inui Pisinnaatitaaffii pillugit Kalaallit Nunaata Siunnersuisoqatigiivi imminnut attuumassuteqaratik suleqatigiissutigissavaat.

Inuiaqatigiit pingaartumik inuit innarluutillit kattuffiillu taakkununga sinniisusut Innarluutillit pillugit Isumaqatigiissummi Artikel 33, imm. 3 nakkutilliinermi aamma suliaqartinneqalissapput. Inuit Pisinnaatitaaffii pillugit Instituti, Kalaallit Nunaanni Inuit Pisinnaatitaaffii pillugit Siunnersuisoqatigiit aamma Ilaqutariinnermut, Naligiissitaanermut Isumaginninnermullu Naalakkersuisoqarfik maannamut tamatuma ilaa suleqatigiissutigissagaat Naalakkersuisut siunnersuutigaat, tamannalu ingerlanneqassalluni innarluutillit pillugit kattuffiit naammattumik suleqatigiissinnaasunik sinniisoqalernissaasa tungaanut.

Paasissutissaq tamanna ataatsimiititaliap tusaatissatut tiguaa, taamaattorli peqatigisaanik kaammattuutigalugu innarluutillit kattuffiisa nukittorsarneqarnissaat tapersorsorneqarnissaallu kaammattuutigalugu, taamaaliornikkut taakku inuiaqatigiit sinnerlugit Innarluutillit pillugit Isumaqatigiisummi Artikel 3 imm. 3 naapertorlugu suliaq ingerlanneqarsinnaaqullugu.

Innarluutilinnut inissaqarniarnerat, ilinniartitaanerat aamma suliffissaqarniarnerat

Aallarniutigalugu siunnersuutinik suliaqarnermi partiinit arlalinnit erseqqissaatigineqarpoq, innarluutillit angerlarsimaffiutitta illutaasa annertuumik nutarterneqarnissaat pisariaqartoq. Tamatumunnga atatillugu pineqartumi nunap immikkoortuinut pilersaarummik suliaqartoqassasoq Ilaqutariinnermut, Naligiissitaanermut Isumaginninnermullu Naalackersuisumut ataatsimiititaliap erseqqissaatigaa. Angerlarsimaffiutigut amerlasuut ajoraluartumik naapertuuttumik aaqqissugaanngillat nutaalianillu atortorissaarutinik amigaateqarlutik, taamaattumillu najugaqartunut sulisunullu tulluaratik.

Atuarnerup ilinniagaqarnerullu tungaatigut aamma nukittorsaanissaq annertuumik pisariaqartinneqarpoq, taamaalilluni innarluutillit innuttaasut allat assigalugit ataqatigiittumik, ineriartuutaasumik neqeroorutinik ineriartornissamullu periarfissanik periarfissanik qulakkeerunneqarsinnaaqullugit.

inuusutut innarluutillit immikkut pilersaarusiukkamik efterskolertalernissaat pillugu UKA 2011/22-imut aalajangiiffigisassatut siunnersuutip akuerineqartup inatsisiliornissami Naalackersuisunit eqqumaffigineqarnissaa aammalu aalajangiiffigisassatut siunnersuutini allani assingusuni innarluutillit pisinnaatitaaffiisa atugaasalu sammineqarnissaat Naalackersuisunit eqqumaffigineqarnissaa inatsisissap suliarineqarnerani ataatsimiititaliamit innersuussutigineqassaaq.

Innarluutillit piginnaasaminnut ineriartornissaminnullu naleqquttumik suliffeqarfinnut iserniarnissaminnut periarfissaqarnissaasa qulakkeerneqarnissaa annertunerusumik sammineqarnissaa pisariaqartinneqartoq isumaqarfigineqarpoq. Innarluutillit pillugit Isumaqatigiisut inatsimmut attuumassuteqartumut atuutilersinneqarnissaa pineqartumilu politikikkut ingerlanneqartumut tunngatillugu suliap ingerlanneqarnerani tamanna pingaartissagaat ataatsimiititaliamit Naalackersuisut qinnuigineqarput.

Sulisoqarnerup tungaatigut nukittorsaaneq qaffasaanerlu

UPA 2014/111-mut siunnersuummi 2014-imi upernaakkut ataatsimiinnermi tamanit akuerineqartoq suli atuunera pillugu aalajangiiffigisassatut siunnersuutini qulequtarineqartunut attuumassuteqarnera ataatsimiititaliamit eqqaasitsissutigineqassaaq.

Aalajangiiffigisassatut siunnersuut ima oqaasertaqarpoq:

**Nunatsinni innarluutilinnik sullissisuusut ilinniagaqarnissamut
piginnaangorsarnissamullu pisariaqartitaat aallaavigalugit Naalackersuisut
iliuusissamik suliassamullu piareersaasiamik innarluutilinnik sullissinermi
piginnaangorsarnissamut pisariaqartitat tamakkiisumik pigilernissaannut
tikkuussisunik UPA 2015-mut saqqummiusseqqullugit peqquneqarnissaannik
Inatsisartut aalajangiiffigisassaattut siunnersuut.**

innarluutilinnut sullissisut ilinniartitaanerisa, ilinniaqqittarnissaannik
pikkorissarneqartarnissaannillu pisariaqartitat qanoq naammassineqarsinnaanerit siumut
isigisumik periusissiamik iliuusissatullu pilersaarummik Naalackersuisut
saqqummiussaqaarnissaannik siunnersuut tunngassuteqarpoq.

Sulisut pisariaqartumik piginnaasallit piginnikkutsigit innarluutillit matumani ilanngullugu
innarluutilinnik isumassuineq akisussaaffiit suliassallu aqqissinnaanagillu
suliarineqarsinnaanngillat, taamaattumik siunnersuut pingaaruteqartorujussuartut
ataatsimiititaliamit suli isumaqarfigineqarpoq. Siunnersuummik aappasaaneerinissamut
ataatsimiititaliap isummerneranum Naalackersuisut isumaqataanerlutik
ilisimatitsissutigissagaat, matumani ilanngullugu nalunaarusiaq kissaatigineqartoq
Naalackersuisut qaqugu saaqummiutilersaarneraat aappasaaneerinissamut ataatsimiititaliamit
Naalackersuisut qinnuigineqassapput.

Innarluutilinnut ilaquataasut pillugit

Innarluutilinnut immikkoortumi inatsisissamik suliaqarnerup ingerlanneqarnerani
innarluutillit ilaquataasa atugaasa nukittorsarneqarnissaat ataatsimiititaliamit
Naalackersuisunit qinnuigineqarpoq. Matumani assersuutigalugu neqerooruteqarnikkut
immikkullu siunnersuisoqarnissaa, tarnip pissusaanik immikkut ilisimasalinnit
ikiorserneqarnissap, ilaqutariinnik katsorsaanerup, oqilisaanerup namminerlu meerarisap
ilaqutallu innarluutilinnik meerartalinnik periarfissat atorlugit paarsinissamut
isumaginninnissamulu neqerooruteqarnikkut qulakkeerinninnikkullu
qulakkeerneqarneratigut.

Innarluutilinnik immikkut illersuineq pisinnaatitaaffiisalu qulakkeerneqarnissaat

Innarluutillit immikkut sanngiissuseqarput kinguaassiuutitigut aningaasaqarnikkullu aammalu
uukapaatinneqarnissaminnut immikkut navianartorsiuuteqartut, taamaattumillu
innarluutilinnut taamatut atornerluisarneq Naalackersuisunit pitsaaliorneqarnissaa
ataatsimiititaliamit innersuussutigineqarpoq. Ulloq unnuarlu angerlarsimaffinni sulisut
suleqatigalugit ilaatigut tamanna pisinnaavoq. Ulloq unnuarlu angerlarsimaffinni
innarluutilinnut inersimasunut kinguaassiuutit pillugit politikkimik

aalajangersaasoqartariaqartoq atoqatigiittarneq, pitsaaliuineq pasitsaassisoqartillugulu sullissineq sammineqarnissaat pissusissamisoortariaqarluni. Kinguaassiuutit pillugit politikkimik kaammattuutigineqartumik ulloq unnuarlu angerlarsimaffiit innarluutilinnut inersimasunut peqartoqarnersoq nassuiaatigineqarnissaa siunnersuutip inaarutaasumik aappassaaneerreqarnerani Naalakkersuisunut ataatsimiititaliamit qinnutigineqassaaq. Matumunga ilassutigalugu meeqqanut inuusuttunullu annertuumik innarluutilinnut ulloq unnuarlu angerlarsimaffinni najugalinnut kinguaassiuutitigut atonerlunneqannginnissamut assingusumik illersuinissamut politikkeqartoqarnersoq Naalakkersuisunut nassuiaatigeqquneqarpoq. Innarluutilinnut ulloq unnuarlu angerlarsimaffinni najugaqanngitsunut qanoq kinguaassiuutitigut atonerlunneqannginnissaat pillugu illersorneqarnerisut kiisalu ajornartorsiut tamanna kommuninit qanoq isumagineqartarnersoq ilanngullugu Naalakkersuisut nassuiassagaat qinutigineqarpoq.

Innarluutillit innuttaasut allat assigalugit inuiaqatigiinni peqatigiiffilerinermilu, nammineq inuuneqarnissamut, naleqarluni inuunissamut, kinaassutsimik pilersitsinissamut inuk ataqqineqartarpoq, taamaattumillu tamakkunatigut Innarluutillit pillugit Isumaqatigiissutip atuutilersinneqarnissaata qulakkeerreqarnissaa ataatsimiititaliap Naalakkersuisut kaammattuutigissavaa.

Siunnersuutit aningaasatigut kingunerisassaat

Siunnersuuteqartut Inatsisartut Suleriaasiat naapertorlugu siunnersuutini aningaasatigut kingunerisassat allaaserineqarsimasut ataatsimiititaliamit maluginiarneqarpoq.

Innarluutillit pillugit Isumaqatigiissutip inatsimmut attuumassuteqartumut atuutilersinneqarnissaanik suliaqarnermi allaffimmiup ataatsip A/C-p ukiumut akissarsiarisartagaasa nalinginik immikkoortitsisoqassasoq isumaqarfigineqarpoq. Matumani ilangunneqassapput nutserinermi aningaasartuutit. Suliassaq Naalakkersuisut allaffissornikkut sinaakkutaasa pineqartumut immikkoortinneqartup iluini ingerlanneqarsinnaasut siunnersuutit ingerlanneqarsinnaasut naatsorsuutigineqarpoq.

Saqqummiunneqartut ataatsimiititaliap tusaatissatut tiguai allaanerusumillu naliliinani.

Ataatsimiititaliap inassuteqaataa

Siunnersuutit marluk ilusimittut iluseqartillugit akuerineqassasut ataatsimiititaliap isumaqatigiittup inassutigaa.

Taama oqaaseqarluni isumaliutissiisummilu oqaatigineqartunik paasinnilluni siunnersuutit ataatsimiititaliap aappassaaniigassanngortippai.

Tillie Martinussen,
Siulittaasoq

Agathe Fontain

Jess Svane

Laura Tàunâjik

Ineqi Kielsen

Ane Hansen

Mimi Karlsen